

ACTA DA REUNIÓN ORDINARIA DA COMISIÓN INFORMATIVA DE RÉXIME INTERIOR, ECONOMÍA, FACENDA E AXENDA DIXITAL DO DÍA 22 DE XULLO DE 2022.

PRESIDENTE:

D. CARLOS LÓPEZ FONT.

VOGAIS:

D.SANTOS HÉCTOR RODRÍGUEZ DÍAZ.
DONA ANA MARÍA MEJÍAS SACALUGA.
D. GORKA GÓMEZ DÍAZ.
DONA NOEMÍ OUTEDA PROL.
DONA RAQUEL GIRÁLDEZ ARMAS.
DONA OLGA MARÍA GARCÍA BALLESTEROS.
D. GREGORIO AGÍS GÓMEZ.
D. JOSÉ ALFONSO MARNOTES GONZÁLEZ.
D. JORGE CUBELA LÓPEZ.
D. MANUEL ALEJANDRO LORENZO ALONSO
DONA MARÍA PAZ LAGO MARTÍNEZ.
DON IGNACIO MARIL PARDO.
D. JOSÉ CARLOS LÓPEZ CAMPOS.
D. JAVIER TOURÍS ROMERO.
D. XOSÉ CESÁREO MOSQUERA LORENZO.
DONA MARÍA ORTEGA IÑARREA.

En Pontevedra, na sala de xuntas do Pazo Provincial, sendo as 12,00 horas do día 22 de xullo de 2022 asisten, baixo a Presidencia de D. Carlos López Font Presidente da Comisión Informativa de Réxime Interior, Economía, Facenda e Axenda Dixital, as deputadas e deputados que ó marxe se sinalan, membros de dita Comisión, de acordo coa correspondente Orde do Día.

Asisten o Sr. Interventor, Don Antonio Graña Gómez e tamén o Sr. Secretario, D. Carlos Cuadrado Romay.

Actúa como Secretario, por delegación do Sr. Secretario Xeral, Don José Antonio Gulías Varela, Técnico de Xestión do Servizo de Contratación, Facenda e Patrimonio.

Aberta a sesión, adoptáronse os seguintes acordos:

- 1. APROBACIÓN, SE PROCEDE, DA ACTA DA REUNIÓN ORDINARIA DA COMISIÓN INFORMATIVA DE RÉXIME INTERIOR, ECONOMÍA, FACENDA E AXENDA DIXITAL, DO DÍA 17 DE XUÑO DE 2022.**

Sometido a votación o asunto, apróbanse por unanimidade a acta da reunión ordinaria da Comisión Informativa de Réxime Interior, Economía, Facenda e Axenda Dixital, do día 17 de xuño de 2022.



2. APROBACIÓN INICIAL DO EXPEDIENTE DE MODIFICACIÓN DE CRÉDITOS NÚMERO 4/2022. (EXPTES.- 2022048342- 2022048057).

O Presidente da Comisión somete a debate a proposta de acordo sobre a aprobación inicial do expediente de modificación de créditos número 4/2022, asinada polo Xefe do Servizo de Orzamentos, Plans e Organismos, con data 19 de xullo de 2022, e na que figura o conforme do Deputado Delegado da área de Réxime Interior, Economía, Facenda e ORAL, cuxo contido é o seguinte:

“O Deputado Delegado de Réxime Interior, Economía, Facenda e ORAL, en virtude das atribucións delegadas pola Presidencia da Deputación de Pontevedra, propón ó Pleno a aprobación do expediente de modificación de crédito número 04/2022. Este expediente inclúe créditos extraordinarios (EXT.04/22), por importe de 13.780,00 euros, suplementos de créditos (SUP.04/22), por importe de 270.000,00 euros e modificación do “Anexo II das bases de execución”.

Resultando que a tramitación deste expediente está motivado pola necesidade de realizar gastos que non poden demorarse ata o exercicio seguinte por non existir consignación suficiente no estado de gastos do orzamento corrente, financiándose:

- *Crédito extraordinario (EXT. 04/22), con baixas por anulación correspondentes a previsión para “Convenios con Universidades, Proxectos Transfronteirizos” da aplicación 22/942-9431-454.94, con destino ao convenio/subvención nominativa con IGADI (Instituto Galego de Análises Documental Internacional (G36741049), actividade: “A Deputación de Pontevedra e a acción exterior de Galicia”.*
- *Os suplementos de créditos (SUP. 04/22), na súa totalidade con baixas das aplicacións 22/240-2410-489,02/2021 e 22/457-4500-208,00, sendo ditos créditos reducibles sen supoñer unha perturbación nos correspondentes servizos.*

Resultando que a Intervención emite informe de data 19 de xullo de 2022, no que indica que o expediente cumpre cos requisitos previstos na normativa de aplicación, tanto en relación cos gastos que se pretenden financiar como cos recursos que os financian, e que a súa tramitación respecta o equilibrio orzamentario.

Considerando o disposto nos artigos 177, 179 e 180 do Real Decreto Lexislativo 2/2004, de 5 de marzo, polo que se aproba o Texto refundido da Lei reguladora das Facendas Locais; nos artigos 34 a 38 e 40 a 42 do Real Decreto 500/1990, de 20 de abril, nos artigos 2,3,11,27 e demais concordantes da Lei Orgánica 2/2012, de 27 de abril de Estabilidade Orzamentaria e sustentabilidade financeira, e nas bases de execución do



orçamento, en canto a competencia e tramitación a seguir para a aprobación do expediente de modificación de crédito número 04/2022.

O Pleno, de conformidade co ditame favorable da Comisión Informativa de Réxime Interior, Economía, Facenda e Axenda Dixital, acorda:

Primeiro: Aprobar o expediente de modificación de crédito número 04/2022 da Deputación de Pontevedra, este expediente inclúe créditos extraordinarios (EXT.04/22), por importe de 13.780,00 euros, suplementos de créditos (SUP.04/22) por importe de 270.000,00 euros, e baixas por anulación que os financian por importe de 283.780,00 euros . O Detalle do expediente e o seu financiamento é o seguinte:

1. Créditos Extraordinarios "EXT. 04/22":

APLICACIÓN	DENOMINACIÓN	IMPORTE
942-9431-489,01	A FAMILIAS E ENTIDAES SEN FINS DE LUCRO_ COOPERACIÓN [Subvención nominativa con IGADI (Instituto Galego de Análises Documental Internacional (G36741049), actividade: "A Deputación de Pontevedra e a acción exterior de Galicia"]	13.780,00 €
	Total créditos extraordinarios...	13.780,00 €

Financiamento do expediente de créditos extraordinarios 04/22:

O convenio/subvención con IGADI (Instituto Galego de Análises Documental Internacional), financíase con baixas da aplicación 22/942-9431-453,94, ditos créditos estimase reducible sen perturbación dos respectivos servizos.

Contabilizándose as seguintes operacións:

BAIXAS POR ANULACIÓN:

APLICACIÓN	DENOMINACIÓN	IMPORTE
942-9431-453,94	UNIVERSIDADES PROXECTOS TRANSFRONTEIRIZOS_ COOPERACIÓN.	-13.780,00 €



	Total baixas por anulacións...	-13.780,00 €
--	---------------------------------------	---------------------

2. Suplemento de crédito "SUP. 04/22":

APLICACIÓN	DENOMINACIÓN	IMPORTE
330-3340-226,32	GASTOS DIVERSOS, PROGRAMA DE TEATRO_CULTURA (Tornar ás Táboas)	25.000,00 €
330-3340-226,33	GASTOS DIVERSOS, PROGRAMA DE CINE_CULTURA (Cine-móbil musicalizado)	245.000,00 €
	Total suplementos de créditos...	270.000,00 €

Financiamento do expediente de Suplementos de Créditos 04/22:

O expediente finánciase con sobrantes/baixas das aplicacións 22/240-2410-489,02/2021 e 22/457-4500-208,00, sendo ditos créditos reducibles sen supoñer unha perturbación nos correspondentes servizos.

Contabilizándose as seguintes operacións:

BAIXAS POR ANULACIÓNS:

APLICACIÓN	DENOMINACIÓN	IMPORTE
240-2410-489,02/2021	A FAMILIAS, "O TEU PRIMEIRO EMPREGO, EMPRESAS"_FOMENTO DE EMPREGO	-110.000,00 €
457-4500-208,00	ARRENDAMENTO DE OUTRO INMOBILIZADO MATERIAL_ARQUITECTURA	-160.000,00 €
	Total baixas por anulacións...	-270.000,00 €

Resumo do expediente:

TOTAL SUPLEMENTOS...	270.000,00 €
TOTAL CRÉDITOS EXTRAORDINARIOS...	13.780,00 €



TOTAL BAIAS POR ANULACIÓN...	-283.780,00 €
SUMA...	0,00 €

O Resumo das modificacións por capítulos son as seguintes:

Capítulo 2º Gastos en bens correntes e servizos.....	110.000,00 €
Capítulo 4º Transferencia correntes.....	-110.000,00 €
TOTAL VARIACIÓN POR CAPÍTULOS...	0,00 €

3. Modificación do Anexo II das bases de execución, engadindo e modificando como subvención nominativa do Servizo Cooperación, a seguinte:

APLICACIÓN	BENEFICIARIO/ FINALIDADE	CRÉDITO	Obxecto e finalidade
22/942-9431-489.01	A FAMILIAS E ENTIDADES SEN FINS DE LUCRO_ COOPERACIÓN TRANSFRONTEIRIZA	13.780,00 €	
G-36.741.049	IGADI (Instituto Galego de Análises Documental Internacional).	13.780,00 €	"A Deputación de Pontevedra e a acción exterior de Galicia"

Segundo: Este expediente de modificación de créditos número 04/2022 que inclúe créditos extraordinarios (EXT.04/22), por importe de 13.780,00 euros e suplementos de créditos (SUP.04/22) por importe de 270.000,00 euros, máis as modificacións do "Anexo II" das Bases de execución do orzamento, exporase ó público para os efectos de reclamacións, por un período de quince días hábiles, contados desde o día seguinte ao da publicación do anuncio no Boletín Oficial da Provincia de Pontevedra (BOPPO).

As reclamacións, reparos ou observacións que se presenten serán estudados, no seu caso, polos servizos técnicos da Deputación de Pontevedra e posteriormente pola Comisión informativa de Réxime Interior, Economía, Facenda e Axenda Dixital, que formulará ao Pleno a proposta de aprobación definitiva deste expediente.

Este acordo de aprobación inicial do expediente de modificación de créditos número 04/2022, entenderase definitivamente aprobado no caso de que no prazo de exposición pública non se formulasen reclamacións contra o mesmo."

Unha vez debatido o asunto e segundo o establecido nos artigos 32 da Lei 7/1985, de 2 de abril, reguladora das bases do réxime local, 52 do Regulamento orgánico da Deputación de Pontevedra e 126 do Real Decreto 2568/1986, de 28 de



novembro, polo que se aproba o Regulamento de organización, funcionamento e réxime xurídico das entidades locais, sométese a votación a proposta de acordo asinada polo Xefe do Servizo de Orzamentos, Plans e Organismos, con data 19 de xullo de 2022, e na que figura o conforme do Deputado Delegado da área de Réxime Interior, Economía, Facenda e ORAL, obtendo o seguinte resultado:

1. **Votos a favor: (17)**, sendo oito (8) do grupo provincial do PSG-PSOE, (7) do grupo provincial do Partido Popular, e dous (2) do grupo provincial do BNG.
2. **Votos en contra: (0)**, ningún.
3. **Abstencións: (0)**, ningunha

A Comisión Informativa de Réxime Interior, Economía, Facenda e Axenda Dixital ditamina favorablemente a proposta de acordo relativa á aprobación inicial do expediente de modificación de créditos número 4/2022, cos votos a favor das Deputadas e Deputados dos grupos provinciais do PSG-PSOE, do grupo provincial do Partido Popular e do BNG.

3. MODIFICACIÓN DO ANEXO I DO ACORDO REGULADOR DO PREZO PÚBLICO POLA PRESTACIÓN DE SERVIZOS NA ESCOLA INFANTIL 0-3 ANOS DO CENTRO PRÍNCIPE FELIPE. (EXPTE.- 2022047455).

O Presidente da Comisión somete a debate a proposta de acordo asinada polo Deputado Delegado da área de Réxime Interior, Economía, Facenda e ORAL, con data 18 de xullo de 2022 en relación co asunto relativo á modificación do anexo I do acordo regulador do prezo público pola prestación de servizos na Escola Infantil 0-3 anos Príncipe Felipe, cuxo contido é o seguinte:

“Visto o informe - proposta da Xefa de servizo do Centro Príncipe Felipe e da Deputada delegada, para modificación do anexo de tarifas por prestación do servizo de asistencia educativa e comedor, co obxecto de introducir unha maior desagregación nos tramos tarifarios empregando os mesmos niveis aplicados pola administración autonómica e establecendo novos importes para cada tramo, con gratuidade total (sen e con servizo de comedor) no primeiro tramo e parcial (sen servizo de comedor) no segundo tramo, correspondente en ambos casos con unidades familiares de menor capacidade económica (inferior ao 50% do



IPREM). Así mesmo, prevese a posibilidade de aplicación de cotas gratuíta no servizo de atención educativa, no suposto de adhesión da entidade xestora a posibles convocatorias que cubran os custes da aplicación das bonificacións aplicadas.

Visto o informe da Intervención provincial de data 18/07/2022.

Vista a competencia da Xunta de Goberno en materia de establecemento e regulación de Prezos públicos segundo o disposto no artigo 46 do TRLRFL e acordo de delegación de competencias plenarios na Xunta de Goberno Provincial de data 30/12/1992 (BOP nº 14, 22/01/1993).

Á vista do exposto, PROPOÑO á Xunta de Goberno, previo ditame da Comisión Informativa de Réxime Interior, Economía, Facenda, e ORAL, a aprobación da seguinte proposta de ACORDO:

Primeiro. Aprobar a modificación do anexo I do Acordo regulador dos prezos públicos polos servizos que se prestan na Escola Infantil “Príncipe Felipe”, que queda redactado como segue:

1. Prezos pola asistencia educativa en xornada completa e comedor da Escola Infantil 0-3 anos Príncipe Felipe, importe mensual en euros:

Prezos pola asistencia educativa en xornada completa da Escola Infantil Príncipe Felipe 0-3 anos, importe mensual en euros	Atención educativa sen comedor	Atención educativa con comedor
Inferior ao 30 % do IPREM	0,00 €	0,00 €
Entre o 30 % do IPREM e inferiores ao 50 % do IPREM	0,00 €	16,50 €
Entre o 50% do IPREM e inferiores ao 75% do IPREM	43,10 €	63,85 €
Entre o 75% do IPREM e inferiores ao 100% do IPREM	86,20 €	111,20 €
Entre o 100% do IPREM e inferiores ao 125% do IPREM	116,20 €	155,20 €
Entre o 125% do IPREM e inferiores ao 150% do IPREM	146,20 €	199,20 €
Entre o 150% do IPREM e o 200% do IPREM	163,20 €	224,70 €



<i>Superiores ao 200 % do IPREM</i>	180,20 €	250,20 €
-------------------------------------	----------	----------

No caso de que a entidade que xestiona a Escola Infantil 0-3 Príncipe Felipe, se adhira a posibles convocatorias na que se estableza a bonificación do concepto atención educativa, resultará de aplicación a seguinte tarifa:

Prezos pola asistencia educativa en xornada completa da Escola Infantil Príncipe Felipe 0-3 anos, importe mensual en euros	Sen servizo de comedor	Con servizo de comedor
<i>Inferior ao 30 % do IPREM</i>	0,00 €	0,00 €
<i>Entre o 30 % do IPREM e inferiores ao 50 % do IPREM</i>	0,00 €	16,50 €
<i>Entre o 50% do IPREM e inferiores ao 75% do IPREM</i>	0,00 €	20,75 €
<i>Entre o 75% do IPREM e inferiores ao 100% do IPREM</i>	0,00 €	25,00 €
<i>Entre o 100% do IPREM e inferiores ao 125% do IPREM</i>	0,00 €	39,00 €
<i>Entre o 125% do IPREM e inferiores ao 150% do IPREM</i>	0,00 €	53,00 €
<i>Entre o 150% do IPREM e o 200% do IPREM</i>	0,00 €	61,50 €
<i>Superiores ao 200 % do IPREM</i>	0,00 €	70,00 €

As cotas bonificadas serán de aplicación para o curso 2022/2023.

A diminución dos ingresos será por conta da entidade que xestiona a Escola Infantil 0-3 Príncipe Felipe, condicionándose a eficacia do acordo á incorporación ao expediente da conformidade da entidade adxudicataria á aplicación das mesmas nos termos referidos.

2. Prezo por servizos complementarios:



Servizos complementarios	Prezo
<i>Comedor por días soltos; No caso de nenos/as que non utilicen habitualmente o servizo de comedor, e que excepcionalmente por motivos xustificados desexen utilizalo algún día solto</i>	4,00€/día
<i>Horario ampliado (hora extraordinaria): con carácter excepcional poderase ampliar a xornada sempre que se acredite a necesidade</i>	20,00€/ hora

Segundo. *Dispoñer a publicación da modificación acordada no Boletín Oficial da Provincia de Pontevedra que entrará en vigor a partir do día seguinte ao da data da súa publicación.”*

Unha vez debatido o asunto e segundo o establecido nos artigos 32 da Lei 7/1985, de 2 de abril, Reguladora das Bases do Réxime Local, 52 do Regulamento Orgánico da Deputación de Pontevedra e 126 do Real Decreto 2568/1986, de 28 de novembro, polo que se aproba o Regulamento de Organización, Funcionamento e Réxime Xurídico das Entidades Locais, sométese a votación a proposta de acordo, obtendo o seguinte resultado:

1. **Votos a favor: (17)**, sendo oito (8) do grupo provincial do PSG-PSOE, sete (7) do grupo provincial do Partido Popular e dous (2) do grupo provincial do BNG.
2. **Votos en contra: (0)**, ningún.
3. **Abstencións: (0)**, ningunha.

A Comisión Informativa de Réxime Interior, Economía, Facenda e Axenda Dixital ditamina favorablemente a proposta de acordo do asunto relativo á modificación do anexo I do Acordo regulador do prezo público pola prestación de servizos na Escola Infantil 0-3 anos do Centro Príncipe Felipe, cos votos a favor das Deputadas e Deputados dos grupos provinciais do PSG-PSOE, do Partido Popular e do BNG.



4. MOCIÓN DO GRUPO PROVINCIAL DO PARTIDO POPULAR EN RELACIÓN Á TRANSFERENCIA DA COMPETENCIA SOBRE A XESTIÓN DO DOMINIO PÚBLICO MARÍTIMO -TERRESTRE. (EXPTE.- 2022048368).

O Deputado, Miguel Adolfo Domínguez Alfonso presentou o día 15 de xullo de 2022 co número de rexistro WEB 2022040322 unha moción do grupo provincial do Partido Popular asinada polo voceiro do grupo, Jorge Cubela López, solicitando a súa inclusión na orde do día do próximo pleno correspondente o mes de xullo de 2022. A moción presentada é para instar ao Goberno Central que transfira a Xunta de Galicia, o antes posible, a xestión de todas as competencias en materia de dominio público marítimo-terrestre, cuxo contido é o seguinte:

“MOCIÓN EN RELACIÓN Á TRANSFERENCIA DA COMPETENCIA SOBRE A XESTIÓN DO DOMINIO PÚBLICO MARÍTIMO-TERRESTRE

Galicia conta con 2.091 quilómetros de perímetro costeiro insular e peninsular, configurándose como o territorio con máis costa de toda a península.

Nos últimos anos, Galicia solicitou ao Goberno central o traspaso das competencias en materia de xestión do dominio público marítimo-terrestre. Reclámase esta xestión porque ten unha especial vinculación con materias que actualmente xa son de competencia autonómica, como son o regulamento urbanístico, a construción de portos ou o control de verteduras na costa.

Esta transferencia facilitaría a simplificación de trámites e evitaría a duplicidade que pode chegar a provocar a existencia de dous niveis administrativos nesta zona, e tomar decisións máis axeitadas. E tamén permitiría a Galicia xestionar as autorizacións e concesións no dominio público marítimo terrestre, tal e como xa sucede en Andalucía e Cataluña, e como se está negociando co País Vasco.

É necesario recordar que na franxa do litoral están asentadas preto de 4.000 edificacións de 82 concellos galegos, unha parte importante da nosa provincia, e que a transferencia permitiría poñer fin aos ataques constantes que o sector mar-industria está recibindo por parte do Goberno central. Uns ataques que xa foron denunciados e advertidos por este grupo provincial, alertando dos prexuízos da nova Lei de Cambio Climático para a nosa industria, xa que con esta nova lexislación ponse en risco a continuidade de moitas empresas que están xerando riqueza e emprego na nosa provincia. O traspaso destas competencias á Xunta de Galicia será unha garantía para a súa continuidade.



En definitiva, é indispensable para Galicia contar con esta transferencia, tendo en conta que a comunidade e os concellos do litoral son os que dispoñen dun maior grao de coñecemento da realidade do litoral galego e do valor que supón o seu patrimonio.

Por todo o anterior, o Grupo Provincial do Partido Popular solicita ao Pleno a adopción do seguinte

ACORDO

Instar ao Goberno Central que transfira á Xunta de Galicia, o antes posible, a xestión de todas as competencias en materia de dominio público marítimo-terrestre.

Sometida a votación a moción do Grupo Provincial do Partido Popular para instar ao Goberno Central que transfira a Xunta de Galicia a xestión de todas as competencias en materia de dominio público marítimo-terrestre, obtívose o seguinte resultado:

- 1. Votos a favor: (17)**, sendo oito (8) do grupo provincial do PSG-PSOE, sete do grupo provincial do Partido Popular e dous (2) do grupo provincial do BNG.
- 2. Votos en contra: (0)**, ningún.
- 3. Abstencións: (0)**, ningunha.

A Comisión Informativa de Réxime Interior, Economía, Facenda e Axenda Dixital ditamina favorablemente a moción do Grupo Provincial do Partido Popular, en relación á transferencia da competencia sobre a xestión do dominio público marítimo-terrestre, cos votos a favor das Deputadas e Deputados dos grupos provinciais do PSG-PSOE, do Partido Popular e do BNG.

- 5. MOCIÓN DOS GRUPOS PROVINCIAIS DO PSDG-PSOE E DO BNG POLA QUE SE SOLICITA DA XUNTA A RECUPERACIÓN DA TARXETA BÁSICA E QUE COMPLETE CON OUTROS 200 EUROS O CHEQUE ESTATAL APROBADO NO**



DECRETO ANTICRISE 11/2022 PARA AS FAMILIAS VULNERABLES. (EXPTE.-2022048591).

Os grupos provinciais do PSdG-PSOE e do BNG, con data 19 de xullo de 2022 presentaron no Rexistro da Deputación de Pontevedra con número de entrada 2022017757, unha moción asinada polos seus voceiros, Don Carlos López Font e Don Xosé Cesáreo Mosquera Lorenzo, na que solicitan á Xunta de Galicia que proceda a efectuar a recuperación da tarxeta básica e que complete con outros 200 euros o cheque estatal aprobado no Decreto anticrise 11/2022 para as familias vulnerables, cuxo contido é o seguinte:

MOCIÓN DOS GRUPOS PROVINCIAIS DO PSdG- PSOE E DO BNG POLA QUE SE SOLICITA DA XUNTA A RECUPERACIÓN DA TARXETA BÁSICA E QUE COMPLETE CON OUTROS 200 EUROS O CHEQUE ESTATAL APROBADO NO DECRETO ANTICRISE 11/2022 PARA AS FAMILIAS VULNERABLES.

EXPOSICIÓN DE MOTIVOS

A Xunta de Galicia deu carpetazo este pasado mes de xuño á Tarxeta Básica, a única medida adoptada polo Goberno galego para axudar ás familias en situación de vulnerabilidade durante a pandemia e o período inmediatamente posterior. A retirada fulminante desta medida non pode ser máis desafortunada pois coincidiu, xustamente, no mes en que Galicia bateu o récord de inflación alcanzando un 11,1% (case un punto máis que a media española).

Cando as galegas e galegos en situación económica máis precaria peor o están a pasar polo crecemento dos prezos na alimentación na nosa terra, a Xunta retira a súa única iniciativa real de corte social alegando, en palabras do presidente Rueda, que a "situación excepcional provocada pola pandemia, está rematada". Tal mostra de insensibilidade merece reproche e crítica social.

Á Xunta non se lle ocorre outra cousa que tratar de tapar unha decisión tan incomprensible e insensible aprobando axudas anecdóticas para pagar o provedor de Internet a esas familias ás que lle retira a axuda para mercar



comida. Ou, con outra pirueta propagandística: axudas para que as mesmas familias que teñen que botar números cada vez que van ao supermercado poidan mercar bicicletas eléctricas, aparellos que polo seu prezo seguirán moi lonxe do seu alcance a pesar das folclóricas subvencións de entre 500 e 700 euros anunciadas por este sorprendente Goberno galego que considera prioritaria a banda ancha ou o ciclismo asistido aos pratos de comida na mesa.

Galicia leva dende febreiro de 2021 rexistrando cifras de inflación superiores ás de España. En xuño bateuse o récord. En lugar de reaccionar, a Xunta vai para atrás e refúxiase na improvisación.

A Tarxeta Básica, que segundo a mesma Xunta de Galicia, beneficiou a 55.000 galegas e galegos é hoxe unha medida que resulta urxente recuperar. Baste con recordar que na nosa provincia expedíronse 3.400 tarxetas (2.200 en Vigo e outras 1.200 en Pontevedra). Tarxetas con cargas de entre 150 e 300 euros ao mes para ir ao supermercado e mercar comida ou produtos de hixiene, é dicir produtos de primeirísima necesidade.

Mentres a Xunta aplica a súa receita habitual de recortes nas medidas sociais o Goberno de España vén de ratificar nas Cortes o Real Decreto 11/2022 de medidas anticrise, co voto favorable do PSOE e o BNG, pero coa abstención do PP. Un decreto que prorroga o desconto de 20 céntimos nos carburantes, establece descontos nos multiviaxes en tren (ampliados agora ao 100%) e dun 30% nos desprazamentos por estrada de competencia autonómica e local. Ademais sube un 15% o Ingreso Mínimo Vital, as pensións non contributivas e as de viúvas e invalidez. Un decreto estatal que rebaixa o IVE das máscaras cirúrxicas ao 4% e o da luz ao 5%, que limita a un 2% a suba nos alugueiros, que prohíbe o corte de subministros básicos, conxela a bombona de butano e impide os despidos por parte das empresas con axudas públicas.

Ademais, o Goberno do Estado aprobou un cheque de 200 euros para persoas autónomas en dificultades e familias en situación de vulnerabilidade económica, amosando así a súa vontade de que ninguén quede atrás, nin na pandemia, nin na crise de inflación global que chega a resultas da crise de materiais e loxística e da guerra de Ucraína.



Preguntado polas medidas aprobadas polo Goberno, a reacción do presidente Rueda, a máxima autoridade desta Xunta que elimina as axudas para comida mentres aproba outras para que as familias vulnerables poidan ter Internet ou bicicletas eléctricas, foi dicir que non lle gusta "o todo gratis".

Por todo elo, o Pleno da Deputación de Pontevedra, ACORDA:

- 1. Instar á Xunta de Galicia a recuperar, con efecto inmediato e permanente a Tarxeta Básica para que as familias vulnerables poidan cubrir as súas necesidades básicas. Manter e utilizar esta tarxeta como "ponte asistencial" de axuda ás persoas que aínda non accederon á cobertura do Ingreso Mínimo Vital e/ou da Risga.*
- 2. Instar á Xunta de Galicia a completar con outros 200 euros o cheque estatal de axuda extraordinaria e de pago único ás persoas autónomas e ás familias vulnerables.*

Sometida a votación a moción conxunta dos grupos provinciais do PSdG-PSOE e do BNG pola que se solicita da Xunta a recuperación da tarxeta básica e que complete con outros 200 euros o cheque estatal aprobado no Decreto anticrise 11/2022 para as familias vulnerables, obtívose o seguinte resultado:

- 1. Votos a favor: (10)**, sendo oito (8) do grupo provincial do PSG-PSOE e dous (2) do grupo provincial do BNG.
- 2. Votos en contra: (0)**, ningún.
- 3. Abstencións: (7)**, sete do grupo provincial do Partido Popular.

A Comisión Informativa de Réxime Interior, Economía, Facenda e Axenda Dixital ditamina favorablemente a moción conxunta dos grupos provinciais do PSdG-PSOE e do BNG pola que se solicita da Xunta a recuperación da tarxeta básica e que complete con outros 200 euros o cheque estatal aprobado no Decreto anticrise 11/2022 para as familias vulnerables, cos votos a favor das Deputadas



e Deputados dos grupos provinciais do PSG-PSOE e do BNG, e coa abstención das Deputadas e Deputados do grupo provincial do Partido Popular.

6. MOCIÓN DOS GRUPOS PROVINCIAIS DO PSdG-PSOE E DO BNG NA QUE SE SOLICITA DA XUNTA DE GALICIA MEDIDAS URXENTES PARA CORRIXIR O MAL FUNCIONAMENTO DO TRANSPORTE PÚBLICO EN GALICIA E, ADEMAIS, QUE EXERZA AS SÚAS COMPETENCIAS E RESPONSABILIDADES DIANTE DA ACTUAL CRISE INFLACIONARIA SUMÁNDOSE ÁS BONIFICACIÓNS ESTATAIS DO 30% NO TRANSPORTE PÚBLICO GALEGO CUN 30% ADICIONAL. (EXPTE.- 2022048592).

Os grupos provinciais do PSdG-PSOE e do BNG, con data 19 de xullo de 2022 presentaron no Rexistro da Deputación de Pontevedra con número de entrada 2022017758, unha moción asinada polos seus voceiros, Don Carlos López Font e Don Xosé Cesáreo Mosquera Lorenzo, na que solicitan da Xunta de Galicia a adopción de medidas urxentes para corrixir o mal funcionamento do transporte público en Galicia e, ademais, que exerza as súas competencias e responsabilidades diante da actual crise inflacionaria sumándose ás bonificacións estatais do 30% no transporte público galego cun 30% adicional, cuxo contido é o seguinte:

“MOCIÓN DOS GRUPOS PROVINCIAIS DO PSdG-PSOE e BNG NA QUE SE SOLICITA DA XUNTA DE GALICIA MEDIDAS URXENTES PARA CORRIXIR O MAL FUNCIONAMENTO DO TRANSPORTE PÚBLICO EN GALICIA E, ADEMAIS, QUE EXERZA AS SÚAS COMPETENCIAS E RESPONSABILIDADES DIANTE DA ACTUAL CRISE INFLACIONARIA SUMÁNDOSE ÁS BONIFICACIÓNS ESTATAIS DO NO TRANSPORTE PÚBLICO GALEGO CUN 30% ADICIONAL.

EXPOSICIÓN DE MOTIVOS

O transporte público por estrada dentro de Galicia é sinónimo mal funcionamento e un exemplo máis do deterioro dos servizos públicos. Os autobuses circulan con impuntualidade, cambios súbitos de frecuencias e incumprimentos das condicións contractuais por parte das empresas concesionarias. Un deterioro que castiga especialmente ás clases traballadoras en tempos de crise inflacionaria global como a que estamos a vivir, entre outras cousas, por mor do estrangulamento dos mercados internacionais de subministro enerxético.



O Plan de Transporte Público de Galicia naceu en 2016. Os 12 millóns de euros que gastou o Goberno galego en consultoras privadas para a elaboración deste documento desembocaron nun servizo de peor calidade e concentrado nunhas poucas grandes empresas, reducindo así a competencia. Dende entón as queixas sucédense por toda Galicia.

A historia deste desastre comezou en 2009 coa Lei de Medidas Urxentes para a Modernización do Transporte público de Galicia, coa que a Xunta pretendeu prorrogar por 10 anos máis as concesións das 129 liñas existentes en Galicia. Un auténtico balonazo á grada para gañar tempo. Xa se advertiu de que se quebraba a legalidade europea que impide os "contratos eternos" neste sector. O asunto rematou mal. O Tribunal Supremo anulou as prórrogas ilegais deixando a credibilidade da Xunta baixo mínimos. Chegamos así ao actual Plan de Transporte de Galicia, que nada solucionou, pois as queixas son tan abondosas que, se non se escoitan máis, é porque non hai un só concello onde o transporte público funcione correctamente.

A Xunta de Galicia tramitou o Plan Galego de Transporte sen enviar borradores a concellos e deputacións, sen aceptar achegas. Sen rastro de diálogo coa Administración local. A mesma Xunta que agora "rásgase as vestiduras" co Plan Estatal de Transportes, que está en fase de consultas previas, é dicir, en fase de borrador. Neste alboroto institucional pouco importa que o Plan Estatal non vaia entrar en vigor ata finais de 2024, ou que o Goberno do Estado mesmo se ofrecera a financiar a posible perda de paradas dentro das comunidades autónomas. Nada importa, en suma, que a provincia de Pontevedra mesmo gañe unha nova liña dende Sanxenxo á Meseta.

Por outra banda, mentres o Boletín Oficial do Estado publica con regularidade medidas destinadas a paliar os efectos da crise reforzando o transporte público, o Diario Oficial de Galicia é o fiel reflexo da atonía desta Xunta de Galicia contemplativa e que se limita a facer de cronista das medidas que se toman en Madrid. O Goberno do Estado vén de ratificar medidas contra a crise que, entre outras importantes cousas para a xente que máis o necesita, supón nun 50% as viaxes en trens de cercanías e media distancia (ampliada posteriormente ao 100%) e, ademais, financiar outra bonificación dun 30% nas liñas de autobuses autonómicas e locais ata final de ano. Ademais, aprobou un crédito de 200 millóns de euros a transferir ás comunidades e cidades para facer posible ese desconto.

Sería acaído que as Comunidades Autónomas se sumaran para ir máis alá nos descontos no transporte público de competencia autonómica, poñendo recursos propios e elevando a bonificación do 30% que paga o Estado ata un 60%.



Diante desta situación, o Pleno da Deputación de Pontevedra, ACORDA reclamar da Presidencia da Xunta de Galicia e da Consellería de Infraestruturas e Mobilidade:

- 1. Escouitar con máis sensibilidade que ata o de agora as queixas sobre o mal funcionamento do transporte público de Galicia. Introducir as correccións necesarias para mellorar os horarios e frecuencias. Inspeccionar con regularidade e sancionar os incumprimentos por parte das empresas concesionarias. Corrixir os pregos de contratación para realizar os cambios precisos e dar así unha resposta axeitada ás necesidades da cidadanía nuns momentos tan extraordinarios como os que estamos a vivir.*
- 2. Cubrir a demanda dos desprazamentos interiores dentro de Galicia que se vexan afectados pola remodelación no mapa estatal que entrará en vigor a finais de 2024. Aproveitar a oferta de diálogo institucional do Ministerio de Transportes, mesmo ofrecendo compensacións económicas, para suplir co mapa galego os servizos nas paradas que, eventualmente, poidan suprimirse dentro da provincia de Pontevedra no marco da reorganización estatal.*
- 3. Reforzar a bonificación estatal do 30% nos desprazamentos en transporte público por estrada dentro de Galicia aprobada e financiada polo Goberno do Estado a través do Real Decreto 11/2022 cun 30% adicional con cargo aos Orzamentos da Xunta de Galicia para que a bonificación total ás persoas usuarias alcance un 60%.*
- 4. Facer un estudio pormenorizado doutras alternativas de transporte público como o transporte a demanda que permita atender todas as necesidades de mobilidade con rigor e eficiencia.*

Sometida a votación a moción conxunta dos grupos provinciais do PSdG-PSOE e do BNG, na que solicitan da Xunta de Galicia a adopción de medidas urxentes para corrixir o mal funcionamento do transporte público en Galicia e, ademais, que exerza as súas competencias e responsabilidades diante da actual crise inflacionaria sumándose ás bonificacións estatais do 30% no transporte público galego cun 30% adicional, obtívose o seguinte resultado:

- 1. Votos a favor: (10)**, sendo oito (8) do grupo provincial do PSG-PSOE e dous (2) do grupo provincial do BNG.
- 2. Votos en contra: (7)**, sete do grupo provincial do Partido Popular.



3. **Abstencións:** (0), ningunha.

A Comisión Informativa de Réxime Interior, Economía, Facenda e Axenda Dixital ditamina favorablemente a moción conxunta dos grupos provinciais do PSdG-PSOE e do BNG pola que se solicita da Xunta de Galicia a adopción de medidas urxentes para corrixir o mal funcionamento do transporte público en Galicia e, ademais, que exerza as súas competencias e responsabilidades diante da actual crise inflacionaria sumándose ás bonificacións estatais do 30% no transporte público galego cun 30% adicional, cos votos a favor das Deputadas e Deputados dos grupos provinciais do PSG-PSOE e do BNG, e cos votos en contra das Deputadas e Deputados do grupo provincial do Partido Popular.

7. **DAR CONTA DO INFORME DE INTERVENCIÓN DO PERÍODO MEDIO DE PAGO A PROVEEDORES CORRESPONDENTE Ó MES DE XUÑO DE 2022. (EXPTES.-2022048340-2022048047).**

A Intervención con data 15 de xullo de 2022, elaborou un informe do período medio de pago a provedores da Deputación de Pontevedra, da Escola Universitaria de Enfermería, do Consorcio Provincial Contraincendios e Salvamento e Consorcio Contraincendios do Deza e Tabeirós-Terra de Montes, correspondente ó mes de xuño de 2022, onde se deixa constancia do seguinte:

“A Lei Orgánica 2/2012, de 27 de abril, introduce o concepto de período medio de pago como expresión do tempo de pago ou retraso no pago da débeda comercial, de xeito que todas as Administracións Públicas, nun novo exercicio de transparencia, deberán facer público o seu período medio de pago que deberán calcular de acordo cunha metodoloxía común establecido no Real Decreto 635/2014 de 25 de xullo polo que se desenvolve a metodoloxía de cálculo do período medio de pago a provedores das Administracións Públicas

O período medio de pago mide o retraso no pago da débeda comercial en termos económicos, como indicador distinto respecto do período legal de pago establecido na Lei 9/2017, de 8 de novembro, de Contratos do Sector Público e na Lei 3/2004, de 29 de decembro, pola que se establecen medidas de loita contra a morosidade nas operacións comerciais.



O artigo 6 do Real Decreto 635/2014 de 25 de xullo, en relación á publicidade do período medio de pago a provedores establece que as comunidades autónomas e as corporacións locais remitirán ó Ministerio de Facenda e Administracións Públicas e publicarán periodicamente, de acordo co que se prevea na Orde HAP/2105/2012, de 1 de outubro, pola que se desenvolven as obrigas de subministro de información previstas na Lei Orgánica 2/2012, de 27 de abril, a información relativa ó seu período medio de pago a provedores referido, segundo corresponda, ao mes ou ao trimestre anterior:

Á vista deste precepto legal o servizo de Intervención elaborou o informe do período medio de pago a provedores da Deputación de Pontevedra e as entidades locais Escola Universitaria de Enfermería, Consorcio Provincial Contraincendios e Salvamento e Consorcio do Deza Tabeirós correspondente ao mes de xuño de 2022 que se expón a continuación:

PERÍODO MEDIO DE PAGO A PROVEDORES XUÑO 2022

Entidade	Mes	Ratio Operacións Pagadas	Importe Pagos Realizados	Ratio Operacións Pendentes	Importe Pagos Pendentes	Período Medio de Pago
Deputación de Pontevedra	Xuño	9,6903388405	4.705.020,65	6,1695883002	945.731,22	9,1010927047
Escola de Enfermería	Xuño	5,0000000000	2.393,70	0,0000000000	0,00	5,0000000000
Consorcio de Incendios e Salvamento	Xuño	24,4356685507	29.196,14	10,2025996720	4.932,93	22,3784565475
Consorcio Deza Tabeiros	Xuño	4,7821892000	7.337,01	9,8089011000	4.779,40	6,7650097595
TOTAL			4.743.947,50		955.443,55	9,1739114237

En base aos cálculos detallados neste informe ponse de manifesto que se **cumpre** co período medio de pago legalmente previsto.



A Comisión informativa de Réxime Interior, Economía, Facenda e Axenda Dixital queda enterada do contido do **informe do período medio de pago a provedores correspondente ó mes de xuño de 2022 da Deputación Provincial de Pontevedra, da Escola Universitaria de Enfermería, do Consorcio Provincial Contraincendios e Salvamento e Consorcio Contraincendios Deza e Tabeiros-Terra de Montes**, en relación ó disposto na Lei Orgánica 2/2012, de 27 de abril de Estabilidade Orzamentaria e Sostibilidade financeira e no Real Decreto 635/2014 de 25 de xullo polo que se desenvolve a metodoloxía de cálculo do período medio de pago a provedores das Administracións Públicas.

8. DAR CONTA DO INFORME DE INTERVENCIÓN RELATIVO Ó CUMPRIMENTO DURANTE O 2º TRIMESTRE DE 2022 DOS PRAZOS DE PAGO DE OBRIGAS EN RELACIÓN CO DISPOSTO NA LEI 3/2004, DE 29 DE DECEMBRO, POLA QUE SE ESTABLECEN MEDIDAS DE LOITA CONTRA A MOROSIDADE NAS OPERACIÓNS COMERCIAIS (EXPTES.- 2022048344 - 2022048325).

A Intervención con data 18 de xullo de 2022, elaborou un informe dando conta do cumprimento pola Deputación de Pontevedra, a Escola Universitaria de Enfermería, Consorcio Provincial Contraincendios e Salvamento e o Consorcio Contraincendios Deza Tabeirós, dos prazos de pago de obrigas durante o segundo trimestre do 2022, en relación co disposto na Lei 3/2004, de 29 de decembro, pola que se establecen medidas de loita contra a morosidade nas operacións comerciais, onde se deixa constancia do seguinte:

“A Lei 15/2010 de modificación da lei 3/2004 de 29 de decembro pola que se establecen medidas de loita contra a morosidade nas operacións comerciais establece no seu artigo 4º que as corporacións locais elaborarán un informe trimestral sobre o cumprimento dos prazos para o pago das obrigas previstos en dita lei, informe que debe remitirse aos órganos competentes do Ministerio de Economía e Facenda e, no seu respectivo ámbito territorial, ao das Comunidades Autónomas que teñan atribuída a tutela financeira das entidades locais. Dita información poderá ser utilizada polas Administracións receptoras para a elaboración dun informe periódico e de carácter público sobre o cumprimento de prazos para o pago por parte das Administracións Públicas.”

Á vista deste precepto legal o servizo de Intervención elaborou o informe de cumprimento pola Deputación de Pontevedra e as entidades locais Escola



Universitaria de Enfermería, Consorcio Provincial Contraincendios e Salvamento e Consorcio Contraincendios da Comarca do Deza e Tabeirós dos prazos para o pago das obrigas correspondente ao 2º trimestre de 2022, que se expón a continuación:

INFORME DE CUMPRIMENTO DE PRAZOS PARA O PAGO DE OBRIGAS CORRESPONDENTE AO 2º TRIMESTRE DE 2022

1. Con referencia á data de conformidade da factura;

➤ **Pagos realizados:**

Pagos realizados	Período Medio pago (PMP) (días)	Pagos realizados no período			
		Dentro Período Legal Prazo		Fóra Período Legal Prazo	
		Nº Pagos	Importe total	Nº Pagos	Importe Total
Deputación de Pontevedra	9	3.207	11.381.862,69 €	29	24.169,19 €
Escola de Enfermería	4	9	8.905,23 €	0	0,00 €
Consorcio Provincial	19	119	95.115,24 €	4	1.032,00 €
Consorcio Deza e Tabeirós	11	61	21.550,78 €	0	0,00 €

➤ **Facturas pendentes de pago:**

Facturas pendentes de pago	Período Medio pendiente pago (PMPP) (días)	Pendentes de pago no período			
		Dentro Período Legal Prazo		Fóra Período Legal Prazo	
		Nº operacións	Importe total	Nº operacións	Importe Total



<i>Deputación de Pontevedra</i>	9	366	884.292,93 €	9	8.379,02 €
<i>Escola de Enfermería</i>	0	0	0,00 €	0	0,00 €
<i>Consortio Provincial</i>	4	9	12.948,88 €	0	0,00 €
<i>Consortio Deza e Tabeirós</i>	10	13	4.826,72 €	0	0,00 €

2. *Intereses de demora pagados*

<i>Intereses de demora pagados</i>	<i>Número de pagos</i>	<i>Importe total intereses</i>
<i>Deputación de Pontevedra</i>	0	0,00 €
<i>Escola de Enfermería</i>	0	0,00 €
<i>Consortio Provincial</i>	0	0,00 €
<i>Consortio Deza e Tabeirós</i>	0	0,00 €

*En base os cálculos detallados neste informe podemos concluir que **se cumpre** co prazo de pago a provedores legalmente establecido.*

A Comisión informativa de Réxime Interior, Economía, Facenda e Axenda Dixital queda enterada do contido do informe trimestral da Intervención sobre o cumprimento, pola Deputación de Pontevedra, Escola Universitaria de Enfermería, Consortio Provincial Contraincendios e Salvamento e Consortio Contraincendios Deza Tabeirós, durante o segundo trimestre de 2022, dos prazos de pago de obrigas en relación co disposto na Lei 15/2010 de modificación da Lei 3/2004, de 29 de decembro, pola que se establecen medidas de loita contra a morosidade nas operacións comerciais.



9. ROGOS E PREGUNTAS

Non se produciron.

E non habendo máis asuntos que tratar, pola Presidencia dáse por finalizado o acto, sendo as doce horas e cinco minutos do día arriba sinalado, do que, como Secretario, dou fe.

O Secretario da Comisión

Asdo.: José Antonio Gulías Varela

(Documento asinado electrónicamente ó marxe)

